

**Ŋwàk nè Ba,
nè Pol à Còm Fa Bùu sè Mvwe'
Lak
TÈTÀLONIKÀ**

Jijipsè à cu mali m̄m̄mvwe' cos nè mvwe' lak Tètàlonikà nè, bə nza' m̄m̄mvè'nè Jisòos nè bwì vèə nè. Bùu mok à sə cèp də nùmbu nè Jisòos nè bwì vè nè à cà lòlaŋ. Fana Pol com ŋwàk nè ba ènə ŋgòtsè' reŋsə fa wo bə zəŋ də ŋkuŋ Jisos Krest sə bwì və ŋga ŋkùì' ghaha sə nzeŋgòŋ anə ve'ε kə dzeŋ nsàp nè co wù kà fùk. Yi nè ye ŋkum sə nzeŋgòŋ ghà ànə yi. Yi nè beŋ wes nwì pwe', nè gu ni' ye co də yi Nwì yi ŋkuŋ fana Jisòs sə kə və.

¹ Còm ŋwàk nè'e m̄u Pol ves Silvanù nè ye Timatì wèŋ bəbε'. Vès còm fa nà' bohòbùu cos nè mvwe' lak Tètàlonikà wèŋ. Wo sè tse' wo Nwì nè yi Tè' avès nè ye Tà Jisòs Krest. ² Vès ləŋ də Nwì nè yi Tè' bə Tà Jisòs Krest gū wəŋ bəbɔŋ, nè fa wəŋ fifi.

Mvè'nè Jisòos Nè Kə Sak Nzeŋgòŋ

³ Vès tse' ŋgòkwasə Nwì ghà nè fòlòŋ bùu wèŋ, bwema avès a. Vès tse' ŋgòkwasə yi ve'nə bùusè nsàp nè wèŋ sə fa ntum bohòNwì nè sə kùk lòmantombì. Nə ye sə' də dzədzəm àwèŋ nè wèŋ tse' bohòmòk bə mòk sə ghaha sə' ghaha. ⁴ Nà'a njo nè vès kùmgè ŋgùŋ mvwe' kwe' bùu cos wèŋ bùu wèŋ sə. Vès kùmgè ŋgùŋ bùusè wèŋ kigè ntum, nè sə dzəm ghaha bohòJisòs

nə ghaha, nga wo sə tùksə wən, wèn sə ye ngə' sè'. ⁵ Yà'sə sə nìtsə' də Nwii nə sak bə zìnə. Bəsə a ye ve'nə fana wèn ye kəkurè ngòkè ye mok mvwe' gan nkum ye sè wèn sə yə ngə' bùu zen sə. ⁶ Nwii nə gu yusè yà'a kəkurè. Bùu sè wo sə yeŋsə wən ngə' yà'a, yi nè yeŋsə fəsə wo ngə' sè'. ⁷ Yi nə gu wèn sè wèn sə yə ngə' yà'sə ngòyòŋsə nə ye vès yàvès sè'. Yi nè gù ve'nə ghà nè Tà Jisòs tesə tsə vè mabu bə masinjaa ye wèn sè wo tse' nàŋ. Yi nə vè ndzənə ləm-mis, ⁸ nə yeŋsə bùu sè wo ka Nwì riŋ ngə', nə yeŋsə sè wo à ka yusè Ntirè nè Bèboŋ nè Tà Jisòs à sè tsə' nə be' ngə' sè'. ⁹ Ngə' nè wo nə ye nə də wo nə maha wà nè kè' mò'fis. Wo nə kà mvwe' sè Tà cu bə bònŋ nàaŋ ye sè sè' kè dzèn yuk. ¹⁰ Yè'sə nè ye nùmbu nè yi nè vè ngòkè jè kəkùksə bohòbùu ye wèn, fana bùu sè wo ànə dzəm bohòyi nə sè mərə, nə sè kwa ve'ε wùriŋ. Wèŋ nə ye sè' mənŋorè wo anə bùusè wèn a dzəm ncèp nè vès à tsə' fa wən nə. ¹¹ Nà'a njo nè vès ləŋ fagè wən riŋriŋ nə. Vès ləŋgè Nwì də yi gu wən ngòye kəkurè bə ncu nè yi à to fis wən də wèŋ cum nà' nə. Vès ləŋ də yi gu ntum awèn sè wèn tse' ngògù bèboŋ yà'a təŋ megu ve'nə. Yi gu fàak awèn sè wèn sə gù bùusè wèn a fa ntum awèn bohòyi sə kə lə kəkurè bə nàaŋ ye. ¹² Bum yè'sə ye-a ve'nə fana liŋ sè Tà Jisòs Kræst nə boŋ bùu wèn, wèn boŋ bwi bùu yi sè'. Yè'sə ve'nə bə bòvəm nè Nwì àvès nə ye Tà Jisòs Kræst.

*Yusè Yà'a Nə Ye
Nkuŋ Krɛst Bwi Və*

¹ Bə nzak nè Tà àvès Jisòs Krɛst ŋgòbwì vèə də ya vesiwèen be'lə yi, nə kə cum mok bəbɛ' fana bwema am wèŋ, mù lɛŋ wɛŋ, ² də kà də wèen sə tsərə jü'rə kɛ'ca bə zɛŋ vɛ'nə duk. Kà də wèen sə saha ntuum awèŋ bə ncɛp nè wo sə cɛp də numbu nè Taa nè bwì vè nə à cà lòlan nà'a sə duk. Kàmòk à cɛp vɛ'nə ŋà tsòhòbum Nwì mòk ŋga yi də yi tse' yumòk sè Nwì à tsè' yi, kè ŋwè nəmòk ŋga yi sə tsòho-a nzak Nwì àlɛ'. Kàmòk bùu mok wèŋ duk də vès à còm tumsə ŋwàk vɛ'nə vès àlɛ'. ³ Kà də wèen me'rə ŋwè nəmòok borə fàk wɛŋ duk. Bəsə numbu ànə nə kà ntòvè tètè tse' ghà nè bwìŋ nə sə gɛŋtu bohòNwì wù kà fàk nà'a kè dzɛŋ ŋkuŋ. Anə ye sè' ŋga ŋwè nè ŋà ŋgwap nə yəəŋ sè' ŋkuŋ. A sè' yi nè yi nè kè bisə ye ŋgwàŋ nə. ⁴ ŋgà ŋgwap ènə nə kà ŋge' bə bum sè bwìŋ kùksəgè yà' co nwì ye fàk. Yi nə bɛŋ bum sè yà'a co nwì pwe'fo'. Yi nə jəŋ ni' ye mɛbu, də yi ghak yà' pwe' yi. Yi nə kə ni cum mənə ndap Nwì nè ghan nə, nə sə tsok də yi Nwì yi.

⁵ Mù à tsè' wɛŋ bum yè'sə ghà nè vesùwèŋ à ye nà'a pwe' laŋ. Wèŋ a swì laŋ à? ⁶ Megu də yumok cu sè yà' sə gù də bum yè'sə kà ŋga'a ntòye. Wèŋ rì yu ànə sə laŋ. Mvèk nə kùrə nùu fana ŋgà gù ŋgwap nə nə yəəŋ. ⁷ Fàak ŋgwap sə sə fàk ŋga'a yè'e ntòsəswihì megu də yusè yà'a nè ye sə nə kà nto ye tètè wo fis gɛsə ŋwè nè yi sə təəŋ lok yà' nə fo' ŋkuŋ. ⁸ ŋgà ŋgwap nə yəəŋ ghà ànə, fana Tà Jisòs nə kə zə nà' bə

yòṅsè nè nje nè yi yòṅsè fis tsə kè cùhu yi. Ghà nè Jisòs nè vè nè, yi nè gu bupsə nà' bə ṅàan ye sè yi yəəṅ vè bə zeṅ sə.

⁹ Ngà ṅwap nè nè vè bə ṅàan Satà, nè sə gu kɛ'ca nsàap maṅgəṅgèen mok ṅòbòrə bwìṅ fo' vɛ'ɛ nduk nè nduk. Yi nè sə gu niṅ kɛ'ca fa bwìṅ nsàap bum mok sè co wu kək yà' tu jip wu. ¹⁰ Yi nè borə bùu sè wo nè bisə wà sə wèṅ bə jòn. Bùu yè'sə wèen nè bisə njo nè wo à ka ncèp nè zìnə nè ya wo tse' lùṅ bùu zeṅ nè dzəm. ¹¹ Búsə wo a gù vɛ'nə fana Nwii nè gu wo ṅòtsərə mègù bum bə jòn, nè sə dzəm sè' zeṅ, ya wo sə dzəm megu mok bum sè yà'a mwès. ¹² Nwii nè gù vɛ'nə ya bùu sè wo à ka zìnə nè dzəm, nè sə kwa yàwo ṅògù bup yà'a wèen nè gbù nzak bohòyi.

Pol Kwe'sə Bùu Tètàlonikà Də Wo Təəṅ Guguṅ

¹³ Vès tse' ṅòkwasə tsə Nwì nè ghà yà lònṅ bùu wèṅ, bwema avès a. Vès sə duk wèṅ sè Tà nè dzəm weṅ yà'a. Nwì ànə yeto, yi cok fis weṅ də wèen nè tse' lùṅ. Yi à gù vɛ'nə bə ṅàan yòṅsè nè nje nè də ya wèen ye bùu ye wèṅ sè wèen rərəṅ. Yi à gù vɛ'nə sè' bə mandzè nè də wèṅ à dzəm ncèp nè nà'a zìnə nè sè'. ¹⁴ Nwì ànə to vè weṅ yè'sə bə mandzè Ntirè nè Bəboṅ nè vès à tsòho fa weṅ nè. Yi à to weṅ yà'sə də ya wèen tse' fis ma njàwèṅ sənə kəkukəsè nè Tà Jisòs Krest àvès nè sè'. ¹⁵ Ye də bwema àvès, wèen təəṅ guguṅ, nè kotse' bum sè vès à tsè' wèṅ yà' sè bə cù kè vès à còm fa-a weṅ bə ṅwàk àlɛ' pwe'fo' cùk. ¹⁶⁻¹⁷ Tà Jisòs Krest àvès, nè ye tè' àvès Nwì

a dzəm ves nə fisə fa ves ntuum avès, nə fa ves ñàñ ñgòcèep nə gu megu yusè yà'a bèboñ. Nwì a nitsə' fa ves dzədzəm ye ya a sè lo mantombi, nə kà kè mèsè yuk. Yi à gu ves ñgònaañ tu də a nè kè tse' bum sè bèboñ. Wo a gu vɛ'nə bə bònəm njàwo nə.

3

Wèeñ Sə Ləñ Fa Ves

¹ Ñgòlèsə lòo fana bwema avès, vès də wèeñ sə ləñ fa ves. Wèeñ sə ləñ fa ves də ncèp nè Tà nə, nà'a sè lo mantombi nènàk nènàk, nə sè fom mvè'nè ànə ye bohòwèñ yà'a. ² Wèeñ sə ləñ fa ves mok sè' də Nwii cañsə fis ves ndzə bohòngàa gu ñgwap bə bùu sè bup wèñ. Vès duk vɛ'nə bùusè sè kà ncèp ènə bwìñ pwe'fo' dzəm wes. ³ Yusə də Tà a ye zìnə. Yi nə guñsə wèñ, nə cañsə gəsə wèñ mvwe' Satà nè yi ñwè nèbup nə. ⁴ Tà a gu ves, vès kà məmərè sè ntuu vès bùu wèñ tse' lok. Vès rì pap də wèeñ nə sə gu tse' megu bum sè vès də wèeñ gu. ⁵ Vès ləñ də Tàa gu busə ntuum awèñ ya wèeñ dzəm bohòNwì, nə fa wèñ kontum nsàp nè Krèst.

NgòCu Ncu Wɛ'

Ka Bèboñ Yèñ

⁶ Yumook yè', bwema avès, vès cèp yè'sə bə lɪñ Tà Jisòs Krèst, də ka də wèeñ sə be'lə bə bwema sè wo dzəm ñgòcu ncu wɛ' duk. Vès sə duk bùu sè wo sè kà mandzè nè vès à yərə wèñ yù yà'a. ⁷ Wèñ rìñ yàwèñ sè' də wèñ tse' ñgòfù'rə mandzè ncu avès. Ghà nè vesùwèñ à ye nà'a, vès à ka

ngàa wɛ' yeŋ. ⁸ Vès à ka yu ɲwè nəmòk ɲga vès ka lak zɹ yuk. Vès à fàk vɛ'ɛ, nɛ ci' ndùrè nè maràŋ bə ndzəmè pwe', də ya vèes kà ɲwè nəmòk ɲgə' wà yamsè fa. ⁹ Vès à sə gù vɛ'nə yè'sə, vès à dzəm-a də wèeŋ fa ves, yumok yà' kà bə jòn sè' ye. Vès à gù yè'sə ɲgògù nì fa wèeŋ ya wèeŋ bɛ' sè' zeŋ. ¹⁰ Vesùwèŋ ànə ye fa' vès tsok wèeŋ sè' laŋ də, <<A ye-a ɲga ɲwè nəmòk duk-a də yi kà fàk fàk, yi kà sè' zɹ.>> ¹¹ Vès sə cèp yè'sə bùusè vès yuk də bùu mok cu mɯŋgorè wèeŋ sè wo sə cu yàwo ncu wɛ'. Wo kà yumok fàk, nə sə dzəm megu ɲgògbù nì kɛ'cà sənə bum bùu mok wèeŋ. ¹² Vès sə cèp yè'e bohònsàp bù ànə ɲgòtip wo bə liŋ Tà Jisòs Krɛst də, wo ko nì', nə fak zɹ bə bo awo. ¹³ Nə ye də kà də wèeŋ wo ɲgògù bəbɔŋ duk, bwema avès a. ¹⁴ A ye-a ɲga ɲwè nəmòk bèn ncèp nè vès còm fa wèeŋ ndzənə ɲwàk nè'e fana wèeŋ kək tasə tse' yi bəbɔŋ, nə kà yumok wənə wèeŋ tse' be'lè lok. Wèeŋ gu vɛ'nə ya marè'tu ko ɲwè ànə. ¹⁵ Nə ye sè' də wèeŋ kà yi co yi ɲwè nè wèeŋ bèn yi bènɲə gù. Wèeŋ tip yi lɛ co yi ye sè' moma awèeŋ.

Cècèpsè Nə Nà' Ləsə

¹⁶ Vès lɛŋ də Tà nè yi fagè fifi yi nə fa wèeŋ fifi, yi bə tu ye. Yi fa wèeŋ fifi bə mandzè nè fòlòŋ ghà yà lòn sè'. Tà nè ye bohòwèeŋ pwe'fo'. ¹⁷ Mùu Pol, mù còm fa wèeŋ cècèpsè ènə mù bə bo sè yàm. Nè'e yu nè wu yə nà' ndzənə ɲwàk, wù riŋ də còm ɲwàk ànə mù nə. Ye'e mvè'nə mù còm gè yàm sə. ¹⁸ Mù lɛŋ də bəbo nè Tà Jisòs Krɛst àvèes ye bohòwèeŋ pwe'fo'.

Nwàk Nwì Ma Rùk Nè Fi
New Testament in Yamba

copyright © 2011 Wycliffe Bible Translators, Inc.

Language: (Yamba)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 22 Feb 2024 from source
files dated 29 Jan 2022

c475d5b3-da44-51cf-93ca-f255b72fe481